

**■ TRIBUNA POLITICA**

# Il nov dretg da submissiun impurtant per il mastergn

DA MARTIN SCHMID, CUSSEGLIER  
DALS CHANTUNS PLD GR

**D**ecisiuns davart submissiuns e surdadas da lavur chaschunan savens vivas discussiuns. Gist er en las regions vai cunzunt era per posts da lavur. Surdadas d'incarcas ad interpresas d'ordaifer mo cun l'argument da pretsch pli favuravel evotgeschan adina puspe discussiuns ed era process avant dretgira che chaschunan retardaments correspundents.

**C**urt avant la pausa da stad ha il parlament federal deliberà sunter lungas tractativas il nov dretg da submissiun resp. d'acquisiziun da lavur. Uschia pudess la nova lescha federala davart la surdada da lavurs publicas revedida totalmain (BöB) prevedentamain entrar en vigur cun l'entschatta da l'onn 2021. Quai vegn er ad esser relevant per il chantun Grischun e per sias vischnancas. Sco member da la cumissiun per economia e taxas hai jau gi l'ocasiun da perseguir fitg intensivamain il process legislativ ed jau hai era sustegnì la lescha revedida en la votaziun finala.

**L**a nova lescha è per blers involvids e cunzunt era per las interpresas pitschnas e mesaunas, dentant era per la confederaziun, ils chantuns e las vischnancas sco era per bleras interpresas publicas da grond'impurtanza pratica. Pertugada n'è betg mo la branscha da construcziun, mabain era purtaders da servetschs intellectuals e numerus auters purschiders da lavur. Il volumen da surdadas da lavurs publicas munta a radund 40 milliard



das ad onn. Malgrà che la nova lescha è da grond'impurtanza per l'economia en il mintgadi n'ha la lescha interessantamain betg giudì grond'attenziun en las medias. Cun la nova lescha succeda ina midada da paradigma sco ell'è vegnida postulada dapi lung temp dal mastergn regiunal. La nova lescha lubescha numadamain da metter daplì la qualitat en il focus, uschia che betg mo il pretsch persul è relevant tar la surdada da lavurs publicas. Quai è effectivamain ina midada da paradigma en il dretg da submissiun publica. Il parlament ha cun quai vulì exprimer ch'era quest element da concorrenza vegnia resguardà en la lescha.

**S**co menziunà na duain en l'avegnir betg la pli bassa, mabain la pli favuravla ed avantagiusa purschida vegnir resguardada. Avert è dentant, sco tar tut las noziuns giuridicas betg definidas, co questa norma vegn interpretada. La formulaziun da la lescha n'è qua betg dal tut determinanta e definitiva. Cler è dentant che tenor la nova lescha n'è betg mo il pretsch, mabain era la qualitat, la persistenza e l'innovaziun duain quintar. Ils criteris da surdada èn formulads uschia che betg l'offerta la bun martgada

survegn automaticamain la meglra valitaziun ed è uschia decisiva tar la surdada. Sco ulteriur criteri per la surdada ha il parlament era resguardà la plausibilitad da l'offerta. Rinforzada en la nova lescha vegn plevant era la procedura da dialog tar prestaziuns intellectualas. En il medem moment sto dentant er il scumond absolut da tractativas da pretsch vegnir respectà. Cun questa stipulaziun persequiteschan ins la finamira d'impedir per tut pretsch «tractativas clandestinas en chombras dascusas».

**S**cadina lescha è mo uschè buna sco quai che las autoritads che han d'applitgar la lescha nizzegian lur libertads d'agir e ch'era las dretgiras recepeschian la finala quests signals. La lescha da submissiun nova ha tschentà ils binaris per ina midada da cultura en il dretg da submissiun. Il legislatur spetga uss che tut ils pertutgads da surdadas da lavur dal maun public, pia era chantuns e vischnancas sco era las dretgiras resguardian e nizzegian la nova pratica da submissiun. Sunter che la confederaziun ha ademplì sia incumbensa èsi uss er il pensum dals chantuns d'adattar tant pli spert lur dretg da submissiun. Lura san era tals che surdattan lavurs publicas en il chantun Grischun nizzegiar lur spazi d'agir en connex cun la surdada da lavurs publicas, cun resguardar era la qualitat da las construcziuns e dals servetschs correspundents. Mastergnants ed artisans vegnan ad esser engraziavels per questa pussaivladad ed era perseguir questas finamiras tar la realisaziun.